

قیمتی قیمتی

PETIKAN TITAH

"JIKA kita bertindak, maka bertindaklah dengan cara kita, seperti juga kalau berfikir, maka berfikirlah dengan cara kita orang-orang Brunei berfikir, tanpa perlu meniru-niru cara orang lain.

Yang penting, kita menangani sebarang impak perubahan dan perkembangan itu, ialah dengan cara realistik dan pragmatik, bagi mempastikan semuanya adalah tetap kukuh dan stabil."

- Titah Sempena Hari Keputeraan Baginda Yang Ke-69 Tahun pada 15 Ogos 2015.



ایمان ایمنی

MANISNYA IMAN

"DARI Ibnu 'Abbas RadhiAllahu'anhu ia berkata : Rasulullah Sallallahu Alaihi Wasallam bersabda kepada seorang lelaki dan Baginda menasihatkannya : rebutlah lima perkara sebelum kamu didatangi oleh lima perkara yang lain. Masa mudamu sebelum tuamu, masa sihatmu sebelum sakitmu, masa kayamu sebelum fakirmu, masa lapangmu sebelum kesibukanmu dan masa hidupmu sebelum matimu."

- (Riwayat Al-Imam Alhakim).

Miliki jati diri mantap dan asli

Assalamu'alaikum Warahmatullahi
Wabarakatuh
Bismillaahir Rahmaanir Raheem
Alhamdulillah Rabbil 'Alameen,
Wabihhee Nasta'eenu 'Alaa Umuuriddunya
Wadden, Wassalaatu' Wassalaamu
'Ala Asyaraafil Mursaleen, Sayyidina
Muhammadin, Wa'alaa Aalihee
Wasahbihee Ajma'een, Waba'du.

Alhamdulillah, beta bersyukur ke hadrat Allah Subhanahu Wata'ala kerana dapat berkumpul untuk menyambut Hari Belia Kebangsaan Ke-10 Tahun 2015 yang bertema : 'Belia Berwawasan Menjana Ekonomi'.

Beta terlebih dahulu mengucapkan Selamat Menyambut Hari Belia kepada semua para belia di negara ini.

Beta amat teruja dengan bertambahnya bilangan profesional, usahawan, karyawan dan tenaga mahir di kalangan para belia kita.

Kita juga berbangga dapat menyaksikan belia-belia itu sudah mula menceburkan diri di bidang-bidang yang kurang diminati, seperti bidang bertenam padi dan membuat kerja-kerja lasak seperti memandu kenderaan berat dan scaffolding.

Demikian juga, golongan belia telah mula terlibat menerokai bidang-bidang baru, seperti bidang industri kreatif, dan juga tidak ketinggalan untuk menceburi pasaran luar negara.

Kaum belia juga didapati aktif melakukan kerja-kerja amal atau sukarela, dan ini, bukan sahaja dilakukan di dalam negara malahan juga di luar negara. Semua itu, amatlah membanggakan kita.

Kaum belia memang digalakkan untuk melakukan apa jua perkara yang bermanfaat, terutama untuk meneroka bidang-bidang baru atau sanggup membuat kerja-kerja lasak, seperti turun ke sawah di bawah panas matahari dan lain-lain. Ini semua sangatlah berguna kepada belia, selaku ejen masyarakat.

Menyebut belia ejen masyarakat, adalah penting bagi mereka itu, untuk memiliki jati diri dan sikap yang mantap.

Kerana tanpa jati diri dan sikap, seorang belia itu tidak akan dipandang hebat.

Maksud beta dengan jati diri di sini, ialah yang original, yang asli, yang bukan disalin atau ditiru daripada orang lain, lebih-lebih lagi kalau yang ditiru itu bertentangan dengan budaya dan adab sopan kita yang baik.

Salah satu contoh budaya dan jati diri yang baik orang-orang Brunei, ialah suka memakai songkok. Sehingga dalam banyak keadaan, mereka itu dapat dilihat memakainya terutama sekali ketika sembahyang dan membaca Al-Qur'an.

Ia sangat sopan dan cantik dipandang mata, dan bahkan, ia juga menjanjikan pahala kepada kita. Kerana bukankah menutup kepala itu salah satu dari sunnah Rasulullah Sallallahu Alaihi Wasallam?

Tetapi agak malang, di era mutakhir ini, orang sembahyang dan membaca Al-Qur'an pun sudah ada yang tidak memakai songkok.

Ini bukan budaya dan jati diri kita, tetapi satu budaya baru yang didapat daripada luar, termasuk yang ditiru dari media.

Beta ingin berpesan, kalau hendak meniru pun, biarlah yang baik, bukan meniru perkara yang tidak baik, apatah lagi yang merugikan.



TITAH Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam sempena Majlis Sambutan Hari Belia Kebangsaan Ke-10 Tahun 2015 pada hari Selasa, 17 Zulkaedah 1436 Hijrah bersamaan 1 September 2015 Masihi di Stadium Tertutup, Kompleks Sukan Negara Hassanal Bolkiah, Berakas.

Ini adalah di antara cabaran yang sedang menunggu para belia kita, di mana mereka itu sangat penting untuk mengelakkan diri daripada terjebak atau terperangkap oleh aliran-aliran budaya baru yang tidak menentu.

Sebaliknya para belia, dikehendaki supaya proaktif dalam memupuk dan memelihara budaya warisan, bukannya membikarkan budaya itu hakis atau mati.

Misalnya budaya dan seni mempertahankan diri, yang kita warisi semenjak sekian lama itu, adakah kita sudah berpuas hati dengannya, ataupun kita sedang cemas kerana

mendapatinya sedang diancam oleh perubahan atau pembaharuan yang menjelaskannya?

Kita bukanlah anti perubahan atau pembaharuan itu, tetapi biarlah perubahan atau pembaharuan tersebut jangan sampai mengurangkan mutu dan sekali gus melunturkan *ketulinan* warisan. Kita sepatutnya mempertahankan warisan dan memberinya nafas yang baru, bukan menyebabkan ia layu dan lumpuh. Inilah tugas para belia bangsa.

Sekian Wabillahit Taufeq Walhidayah, Wassalamu 'Alaikum Warahmatullahi Wabarakatuh.

"BETA amat teruja dengan bertambahnya bilangan profesional, usahawan, karyawan dan tenaga mahir di kalangan para belia kita."

Majlis Doa Kesyukuran sempena Sambutan Hari Belia Kebangsaan



MENTERI KEBUDAYAAN, BELIA DAN SUKAN, YANG BERHORMAT PEHIN ORANG KAYA PEKERMA LAILA DIRAJA DATO SERI SETIA AWANG HAJI HAZAIR BIN HAJI ABDULLAH ketika hadir pada Majlis Doa Kesyukuran, Sembahyang Fardu Maghrib dan Isyak Berjemaah, Membaca Surah Yaa Siin dan Bertahlil sempena Sambutan Hari Belia Kebangsaan di Masjid Kampung Bunut.

Oleh : Haji Mahmud Hafidzie Haji Ali Mashod
Foto : Mohd. Zul-Izzi Haji Duraman

BANDAR SERI BEGAWAN, Isnin, 31 Ogos. - Sambutan Hari Belia Kebangsaan merupakan salah satu dari acara tahunan utama anjuran Kementerian Kebudayaan, Belia dan Sukan (KKBS) yang disambut setiap 1 Ogos bagi memartabatkan pergerakan belia dengan memperingati dan mengumpulkan belia-belia seluruh negara dalam satu perhimpunan dengan kegiatan yang bermakna.

Sempena sambutan tersebut, KKBS telah mengadakan Majlis Doa Kesyukuran, Sembahyang Fardu Maghrib dan Isyak Berjemaah, Membaca Surah Yaa Siin dan Bertahlil di Masjid Kampung Bunut, di sini.

Hadir selaku tetamu kehormat ialah Menteri Kebudayaan, Belia dan Sukan, Yang BerhORMAT Pehin Orang Kaya Pekerma Laila Diraja Dato Seri Setia Awang Haji Hazair bin Haji Abdullah.

Juga hadir ialah Setiausaha Tetap KKBS, Dato Paduka Dr. Haji Affendy bin Pehin Orang Kaya Saiful Mulok Dato Seri Paduka Haji Abidin serta Ahli-ahli Jawatankuasa Tertinggi Sambutan Hari Belia Kebangsaan Ke-10 Tahun 2015.

Majlis juga disertai oleh Alumni Program Khidmat Bakti Negara, Ahli-ahli Persatuan-persatuan Belia, Pelatih-pelatih Pusat Pembangunan Belia, bekas peserta Rancangan Kapal Belia Asia Tenggara, bakal peserta Rancangan Kapal Belia Asia Tenggara, Penuntut-penuntut Institut Tahfiz Al-Qur'an Sultan Haji Hassanal Bolkiah (ITQSHHB), Rekrut-rekrut Angkatan Bersenjata Diraja Brunei, polis, bomba dan warder, Ahli-ahli Kelab Pusat Belia, belia-belia masjid, Ahli-ahli Penasihat Jawatankuasa Takmir Masjid Kampung Bunut dan penduduk sekitar Kampung Bunut.

Sambutan Hari Belia Kebangsaan tahun ini diadakan pada 1 September bertempat di Stadium Tertutup, Kompleks Sukan Negara Hassanal Bolkiah.